



好𪗇樣个細鴨子

農場裡背个細鴨子，正換核孵出來該下个黃毛。佢每日在農場走上走下，項項事頭都好行上前，佢對農場麼个事情都感覺著蓋趣妙。

有一日，佢行啊行仔，堵著雞公大哥，佢看著厥雞公髻恁靚。就在佢看啊呆塑塑該下，雞公大哥擲骸大嘛聲喊：「哦！哦！哦——」細鴨子聽著就問佢：「佢每日臨天光聽著喊跣床个聲，敢就係若聲說？」「係啊！喊大家人跣床係佢个責任。在這個農場裡肚，每一個人都有佢自家愛負責个頭路。你乜有呢！」雞公大哥同佢解釋。細鴨子盡想知啊每日恁早喊大家人跣床係麼个感覺，就同雞公大哥講：「天光日臨天光分佢喊一擺，好無？」分細鴨子嚟啊無結煞也，佢只有答應。

第二日臨天光，雞公大哥還係本本恁早跣，但係佢恬恬仔等看啊細鴨子會仰仔來喊大家人。無幾久，盡大个聲說「呱！呱！呱——；呱！呱！呱——」在農場滿哪仔喊，該聲音吵啊大家都醒也。知啊係細鴨子吵醒大家人，每一個人都譴嘍嘍仔想愛尋佢算帳，這時節雞公大哥正同大家人會失禮，請大家原諒。細鴨子分人罵過後，心情悶啊會死，就走去樹底下屏。

佢在樹底下跣無幾久，就看著有幾下隻鳥仔掛在樹仔項。該兜鳥仔同佢講，掛啊樹仔項做得看著農場外背。佢聽著，又開始想學鳥仔掛在樹仔項也。「掛在恁高个樹仔，敢毋會有危險？」「掛樹仔項，用腳爪等樹杷就做得也，仰仔會有危險？」聽著鳥仔个講解，佢就躡等翼，定定仔半飛半跳，跳上一枝一枝个樹杷。佢上到樹頂項，正看著外背一下仔，就因為腳爪毋纏樹杷，嘎對樹頂項跌下來。好得佢還曉得躡翼，正無橫啊四腳惹天。

佢發現自家無法度學鳥仔掛樹仔項，就一個人走去大魚塘搞水。佢在這魚塘泅水，還係做得搞到盡暢樂。久久仔，佢會沒水去看水肚有麼个。就有一擺，佢正一沒水下去，堵堵好有一尾大鯉嫲在厥身邊泅啊過。佢想愛學鯉嫲，就緊𪗇等佢泅。該鯉嫲毋知細鴨子係愛學佢泅水，看著細鴨子在背尾逐等，嚇啊無命樣仔緊泅緊深。細鴨子毋知鯉嫲已經著驚，煞猛牯學人家沒水，就𪗇等沒一路下去。佢無考慮忒多，等到發現自家會透氣毋轉該下，正拚命仔蹶上來透大氣，差一細息就沉死在水肚。

幾擺个經驗，細鴨子慚起雞公大哥識同佢講過个，每一個人都有自家个責任，佢慚啊慚仔，又在農場走上走下過厥生活也！

作者：陳志寧

☆詞彙學習☆

【𪗇樣】ten^ˊ iong：模仿。

【聲說】sang^ˊ sod^ˊ：聲音。

【行上前】hang^ˊ song^ˊ qien^ˊ：走上前。這裡指湊熱鬧。

【嚟】kieu^ˊ：撒嬌式的要求。

【樹杷】su pa^ˊ：樹枝。

【呆塑塑】ngoi^ˊ sog^ˊ sog^ˊ：呆呆的。

【沉死】ciim xi^ˊ：淹死。

【擲骸】bang^ˊ goi^ˊ：扯開嗓門。